

# Christian Meivah



January - February, 2018

Lhani seh thuso

Private Circulation

## Kum Thah ahung tai

Kum thah 2018 a ilut tauve. Kum thah mu jouse akipah uve. Suti lah lah-a amasa pen hi kum thah suti (holiday) anahi. Kum 4000 masang chun Babylon miten kum thah hi ni somle khat ana mangui. India ding in, Gregorian Calendar dung jui in January kipat ni (Jan. 1) nikho hi thu pi tah ahi. Vannoi leiset a mihem tamtah in, kum thah nikho hi kipah tah in agol apaite, ainsung mite ho toh amang khomui.

India a mi jatchom chom hon kum thah hi nikho chom chom anei ui. Maharashtra state a Chaitra nikho masa pennin anit ui. Amaho paovin hiche nihi 'Gudi Padva' tin aminsah ui. Tamil hon April 13 nihi amaho kumthah in anit ui. Amaho paovin 'Vashaparapu' tin aminsah ui. Amaho pathen lim mai-a phatvet (mirror) khat chule bukong khat sunga theiga, nehthei, sum ho akoi juuve. Muslim hon amaho Islam dung jui in akum thah nin amangui. Bengali hon Vaisakh lha nikho masapen nin anit ui.

Alhang pia seidin, Ps.90:10 in asehi adih jinge. Hinkho hi kum 70 bep ding ahin, ahing sot jep aum

leh kum 80 vel bou ahi, ati hi tuni gei in adih nalai-e. Hin nikho le kum le lha hi hetman lou kah in akichai loi jie. Hijeh chun :

1. *Hinkho chomcha ahi*, geldoh jingute. Thijou din lampi kisemu hite. Tulai hin nehthei khum chungu aki chaini akisunin, lou (damdoi) a jong akichaini (expiry) akisune. Akichai ni akhokal tengleh paidoh ding, don da ding, nehluo ding ahi jitai. Mihem hinkho jong hi ama ama 'expiry date' puma hung peng ngen akihi. Mi alung haan tengleh hiche leiset a hing hing jeng dia kingaito aumjin, hichu adihpoi.

2. *Chingthei tah-a hin* : Ihin kah a ching thei tah le aphachom ding tah-a hin ngai ahi. Eph. 5:15-16 "Iti nachon um ching thei un. Lung thim bei ho banga um louvin, miching ho bangin umun, phat hi kitup kei in mangun, ajeh chu tulai nikho hi apha tapoi" tin akisune.

3. *Hinkho neilo het* : Idia leiset-a eikihin sah ham, tihing ngaito ji ding ahi. Pathenin ima khat tongdoh dia eipen sah-u ahi. Leiset a hing jousen ahinkho-u Pathena apat-u angai-e. Kol le vaite houchom neiho hihen, eiho christian ho kihi jongle Pathen

in mihem hinkho atuh ahi, tihing ngai ahi. Pathen gon dung jui-a peng akihin, Pathen phat chomna dia hin ding ahi. Ecclesiastes lekha bun, ima jouse panna bei ahi, ati hi adih-e. Pathen panna lou hinkho chu panna bei mong ahi.

4. *Nikho phatea sim* : Ihin nikho phatea kisima chule thijou hinkho ding jong ihin pet-a kisuh tup ngai ahi. Kachapang nalai-e, tia kigela mot chon chon phat ahitapoi. Vannoi leiset kivaipoh dan ahoi tapon, ahing sot nalai dia kigel ho, hingsot joulou diu ham ti kichat aumtai. Kum thah ahung lut-a kona lung phatea geltoh angai tai.

1) *Missionary Brainard* : Ama hi American Indian ho lah-a missionary anahin, kum 29 lha 5 leh ni 19 bou anahinge. Athi konin, "Hinkho hi achom nah-e, thilpha themcha ka katong mane, phat le nikho akitol loi in, kalung akim joupoi" tin ana sei-e.

2) *Jim Elliot* : Auca kiti jat ho lah a Pathen na ana tongin, ama hi kum 29 bou ana henge. "Vana gou khol na dia, inei midang toh kihop hi ngol thu ahipoi" anati.

Tuhin eiho din kum masa chu abei tan, khovei inatiu kum hi Pathenin eipe tauve. Hijeh chun hiche kum hi tuhchah kheh utin, moh in chesah daute.

3) *Albert Einstein* : Princeton 'a a Office ah "Thupi tah-a igelu jouse thupi ahidheh pon, iloupi sah hou jou se loupi soh hel loubeh ahi" ti thu hi,

2  
akitah in ahi. Hijeh hin itih chan nahin em, tihing thupia ahipon, nahin sunga Pathen loupina dia ipi nabol doh em, tijoh hi thupia ahi. Hichun nakho nung hinkho hoilai ham ti nako peh ding ahi. 2018 sungin ihinkhou hi Pathen lahthei dol hisah ute !

## Pathen khatseh ahi

Christian te din, Pathen le Jesu Christa chule Lhagao Theng inei ui. Pathen ijat hintem ? Abonuva Pathen ahi. Ahile Pathen thum inei-u ham ? Ahipoi khatseh bou ahi. Na lung dong em ? Ajeh chu leiset lung gel leh thilsim dana thum ahi. Ahinla Pathen thilsim danin khat seh ahi. Bible apumpi phatea akisim le Pathen khat, tahsan, houbung khat ahi, ati.

Tah beh a seidin, Pathen, Chapa, Lhagao Theng amaho thum hi Pathen khat kilanna ahi bouve. Athum un Pathena akigom ui. Pa chu Pathen ahin, Chapa Jesu chu Pathen ahin, chule Lhagao Theng chu Pathen ahi, tia nalah leh akichai jenge. Nang mihem khat lunggel leh hisap banga Pathen uma ahipoi. Pa Pathen hina adang dang mihem thi theipa lunggel leh ngaito to kitoh nai sai lou ahi. Hiche leiset-a thil jousen akipatna anei jin chule akichaina jong anei-e. Pathenin kipatna leh kichai na aneipon, tonsot a hing jing ahi. Aman jong mihem banga penni anei-a chule thini anei leh Pathen hitalou ding ahi. Pathen hi imu sau

lim khat in alim akisem theipoi. Ajeh chu Pathen hi Lhagao ahi (John. 4: 24). Nahou tengle Lhagaova nahou ding ahi. Pathen khatseh ahina chu, Pa, Chapa, Lhagao Theng amaho thum lah-a khat pen kilanna mun a adang teni jong umtha ahi. Hijeh chun thum chu khat ahi. Tekah nan, Jesu Jordan vadunga Baptise achan jou chun vana konin ogin khat in, “Ama hi kachapa deitah ahi, athu ngai un” ahinti. Pathen in van a konin thu ahin sei in, Vakhu khat limin Lhagao chu Jesu henga ahung chutai (Lk.3:21-22). Hikoma hin Pa jong, Chapa jong, Lhagao Theng jong apange. Khat pen kilanna muna athum uva umtei ahi. Hijeh hin ei hon, khat chu thum ahi, itiuve.

Jesu hiche lei a mihem a ahung chun ataojongle apa koma atao jin, kei sanga lenjo kapa aume tin jong ana sei-e (John 14:28). Hi chu mihem ahinaa kona asehi ahi. Ajeh chu ama tahsa phea ahinpet ahi. Jew ho chun, malai peh-a konin “Israel chate ngai un, Pakai Pathen hi khat seh ahi” ana ti jiuve (Deut. 6:4). Hiche hi Jesu jong akam tah in ana seidoh in ahi (Mark 12:29).

Paul in jong Pathen khat seh ahi, anati (1 Cor. 8:4). Thilha hon jong Pathen khat bou ahi, anati (Jacob 2:19). Eiho leiset mihem din vang achom chom thum khat a ki gom hi ahitheipoi. Pathen din ahimo aumpoi. Akidang khat chu, athuma achom choma jong kisei thei ahi.

### Pathen sanga mihem joh

Mark 4 akisimleh Jesun “Koi hileh angaina ding nakhang nei-an ngai hen” tin nivei ana sei-e. Ajeh chu asehi juiten angai mai mai uva, imacha gelthuh lou le chin ding agot lou-u chu, Jesu anahei. Athusei ho chu ichana thupi ham, ti agelna diuva anahil ahi. Solchah 10 akisim le tao na jala Pathenin ihenga thu ahinsei ding thule Ama sei jui ding thu aume. Cornelius le Peter chun taona aman lhon teng, Pathenin thu ahin sei peh ji lhon aja lhone. Ani lhonin *vision* a Pathenin ahin hilji lhone. Cornelius koma vantil khat in, “Joppa a mi phabep solin lang, Peter kiti Simon chu hinle pui hen. Ama chu twikhang len panga cheng, savun sem Simon ina alhung in ahi” ati (Acts 10:5-6). Ahilna chu kicheh tah anahi.

Mi khat seh Joppa a asol louna dia kihil ahi (hichu Km. 45 vel gamla ahi). Cornelius in insung lha cha mini leh a sepai ho lah-a ason pen khat anasol tai. Amaho chun, Simon Peter chu ahin lepui diu ahi (Amaho lah-a khat cha beh in jong Simon Peter chu amukhapon, ajah khah-u bou anahi. Peter chu Jew mi ahin, amaho vang chu Gentile ho ahivu. Agache na diu inneipa chu, itobang miham, amin ipi ham jong vantil chun asehi tai). Seibe ding chu Cornelius chun, “Ahinla Pakai, Simon Peter hi koiham kahe pon, inneipa jong chu koiham kahe kha poi. Joppa jong hi khopi lentah ahi.

Iti jong gakihol theita ding ham ?” tia ale seithei jong vang ahi. Pathen sei chu jui jeng ding agel in, miho chu akouvin, nini lampi Joppa a chun anasol jeng tai. Ajing nikhoa miho chun Joppa aphah ding konin, Peter chu alhunna inchunga taodin ana kaltou tai. Atao pet chun vision anei in (agao changin), agil akel tan, thil pheng lentah khat vana kona hung kikhai lha amui. Asunga chun leiset a ganhing namkim, akithol tho namkim, chule vacha namkim ana ume. Chuin ogin khat in ahenga, “Peter kipat in that inlang nen” ati. Jew khat hipa henga hitia ahung kisei chun, aman jong kidang asan, anom tapoi.

Aman ‘Kanompoi’ tin ogin henga chun thumvei ana sei-e. Peter hinkhoa thum kiti hi aloupie. Jesu helou bang akisah naa chun thum vei kahepoi anatin, Jesu thinaa kona athodoh-a, neilungset hinam, tia ana doh chu jong thumvei ahin, chule hikoma hin jong thumvei ahi. Peter in lung sa-ihna leh ogin thusei chu anoplouna anei in ahi. Ajeh chu Pathen ogin thusei chu anopleh Jew ho Danthu asuh keh anahi. Pathenin Peter chu Jew te Danthu asuh keh sah nom dem ? Neh thei ho chu, Peter anop lou phat in chung lama lahtouvin aum tai. Ahung kouho chu ain mai-a ading tauvin, chu in Lhagao chun ahenga, miho chu kimupia amaho nung ajuina din ahile. Chule athilmu chu neh thei thu, hitalouva mihem thu joh amu, ahidan jong ahin he

tan Cornelius koma, “Pathen in mihem koima aboh le atheng lou kati louna din eivet sah tai” anati tai. Cornelius in a vision mu asehi in, chu le Peter in Christa Gospel thu ahilun, akikhom cheng chung a Lhagao Theng achun, Gentile ho chu abon un, Baptise anachang tauve.

Hichea Peter le Captain Cornelius taona ga hi ihe tauve. Ama ni chonna chom cheh nei, leh mun chom cheh-a cheng ahi lhone. Ahinla Pathenin amani hi akigui jop lhon sah in ahi. Ajeh chu amanin Pathen thu angai lhone. Sei angai lhon jeh in Gospel hi Jew te seh changta louvin eiho Gentile ho jong akichang thei tai.

Eiho hinkhoa jong Peter leh Cornelius henga thu kisei tobanga Pathenin thu ahinsei phat umjia ahi. Hiteng chule amanin nel baotam bollouva, ogin ajui jeng lhon banga ijui uva, sei ingai tengule Pathen phat thei bohna ichan jiu ahi. Pathen aw nahsah louva ikoi tengule phatthei bohna chu kichang thei jilou ahi. Hiti ahijeh hin, Pathen thu hi jui ding hah sa kisa lhez jongle jui pou-pou chu hinkho lolhinna ahi.

Nangma lunggel a hahsa na sah, hithei louhel ding nahisah khat chu Pathen in, bolin ati tengle nabol jenga ahile nahin malsom intin, phat thei bohna kidang dang nahin peh ding ahi. La khat in, ‘Lhasam jeng jong leu hen lha poute’ ati.

## Pathen hi aphai

“Pathen mi khoto hin nang ma lung heisah nagot ahilam helou va, akhoto thalhinje le akho ngaisot na chule athoh hatna hi moh ngansea um nahim?” (Rom. 2:4). Phatea igel leh, Pathen mi khotona hin, mihem lung asuhnem ngai ahi. Phatna isung a achenlou phat a jong Pathen mi hepina chun ijuu jiu ahi. Hijeh a chu Pathen hi ‘Pa’ tia iminsah-u ahi.

1. *Jesu* : Paul in Jesu aseï phai. Ajeh chu Jesun manbei thilpeh mi dangpeh theilou eipeuvin, eihuhhing ui. John 3:16 ah, “Achapa chang khat chu apetai” akiti. Michonse ho hinna dia apeh ahi (Col.2:16). Jesu thi chu vannoi mi hinna ding ahi (Jn. 20:31).

2. *Bible* : Bible hi Pathen kamso thu chu ahin, vannoi leiset a lekhabu minthang pen ahi (2 Tim.3:16). Mi tamtah in Bible hi suhmang agon ajoupoi. Pathen lekhabu ahijeh ahi. Isaiah themgao in, “Hampa agop jin, pahcha apul jie. I-Pathenu thusei vang tonsot-a ding jing ding ahi” ati (Isa 40:8). Pathenin athu manlu eipeh jeh un thangvah ute.

3. *Hepina* : Pathen mihepina (mi lungsetna, ngailutna) ‘Grace’ hi manbei a eikipeu ahi (Rom.3:24). Angaicha jouse din phal ahi (Titus 2:11). Hiche hepina hin sochatnaa eilhut jiu ahi (Eph.2:8). Ahinla hiche hepina (Grace) hi, inopna peh-a, tah san a kisan ngai ahi (2 Cor. 6:10).

Hepina hi adei chan chang ahi. Mi achonse jouse dia kipe ahin, kisan vang ngai ahi, akisan nomlou chu changlou ahi. Akisan ho chu koi hiu vam ? Pathen thusei tahsan ho chu hijiu ahi. Anomlou vang chang lou ahi jenge.

4. *Houbung* (Church) : Jesu Christa Houbung hi manlu tah ahi. Jesun ana phudoh ahi (Mt. 16:18). A.D. 33 chun Jerusalem a ana ki phutdoh masa pene (Acts 2:5). Hia hin aluchang pen Christa ahi (Eph. 1:22). Christa Houbung ahi (Rom. 16:16). Houbung mihon Christa min akipoh uve (Eph.3:15). Houbung in atahsan chu Bible ahi (2 Tim. 3:16-17). Houbung in niseh in lhagao mangthah ho huhhing ding agoi (2 Tim.2:2). Christa Houbung mi jouse van gam lut diu dol ahi (1 Cor. 15:24). Christa Houbung mi ihi jeh un Pathen thangvah ute.

5. *Kinepna* : Christan khat kinepna hi van gam ahi (Eph.4:4). Peter in, “Mi khattou nalung sunguva um kinepna thudol chu, adonga auma ahile, ama donbut ding chun phasa demin umin” ati (1 Pet.3:15). Jesu polama kinepna aumpoi. Jesu bou in kinepna dihtah, achullou ape thei in ahi (1 Thess. 4:13, Eph.2:12). Chuleh Christaa umna, van gam lhun na ding kinepna hi “Hing jing kinepna” chu ahi (1 Pet. 1:3-4). Jesua ko na kinepna muloute chu Damun dia kigosa aumu angai-e. Lampi adang aumpoi. Jesu neijouse van gam dia kinepna hing jing neiho ahiuve.

## Hinkho pumpi Christa dia

(Rev. J. Mang Doungel in *akum somnga alhinna, chule insunga boina hahsatna damthei louna anei vanguva Pathen dia akipehna thusim ahi*).

Amasa penin, “*Pakai chu kelngoi china eichingpa ahin, keima lhasam ponge*” (Ps.23:1). Nov. 12, 2017 nikhho in, Rev. Jangkhomang Doungel, atahsa kum 50 lhin nitna in, Pathen thangvahna maicham chu Ebenezer Home, Satgaon, Guwahati, Assam muna, Guwahati khopi sunga hou natong mi phabep chule ainsung miten, Rev. M. Haokhothong, Sr. Pastor Kuki Worship Service, Guwahati, kin thempu hina in, Pathen thang vahna chule vang thumpehna akinei in ahi.

Rev. Jangkhomang Doungel hi, (late) Upa Ngamkhojam leh (late) Mrs. hoilam chapa sagi lah-a anga channa ahin, Nov. 12, 1967 nikhho’n N. Chingphei vangkho Churchandpur, Manipur a ana peng in ahi. Khosunga Govt. School a 1974 in lekha ahin sim pane. Hia chun, Meitei medium in class 3 (ahum suba) chan ana sime. Kum 1977-1980 sungin, aute lah-a atah (a-upa) pen, D. Jangkholam, L. Phailen KCA Mission School a ojaa apanna munah, English medium in, Class 1 in ana kithah pat kit in, Class V chan ana sime. 1981-1983 chun, Rostad Memorial High

School, Old Churachandpur a Class 6-8 chan ahin simin, 1984 kumin Veikholam Memorial High School, Chingphei khomuna Class IX asimin, chuin 1985 in Churachandpur Govt. High School a ana sime. 1986 a Manipur Board Exam. a Matric abol leh alo sap phat in 1987 in Open School, Central Board of Secondary Education, KV Imphal Centre a Matric ahinpen ahung lolhing tai. Chuin Ningthoukhong muna Mangol Nganbi College, a Pre-University asimin, abanin D.M. College, Imphal a B.A. (Eco) chan ana chai-e.

Feb. 11, 1992 nikhon N. Chingphei KCA Church ah aloinu Dimkhoneng, d/o Pu Helkhojang Guite, Khamenlok village, Sadar Hills, Manipur toh Pathen dan thengin Rev. Ngamjahen in gopna ana nei-e.

*Pathen na ahintoh patna* : 1992-1997 chun KCA noi-a mission na ahin tong in, Cachar Mission Field a ana ume. Chapa khat le chanu khat hikoma ahin nei lhone. Hahsa tah-a mission na atoh lhon ahijeh chun, acha teni chu childhood disability anei lhonin, chate dammo jeh in, 1997 kumin mission field a konin Manipur a ahung kileu vin, galle tol ahat lai ahi jeh in, dei bangin chate ni chu anajen jou kit pouve. 1998 in, Bangalore a Outreach Training Institute a Missionary Training bol dingin, IEM ten kouna ahin peuvin,

ainsung pumpiu vin Bangalore ana jon tauve. Training achai jouvin IEM ten, chateni kijen theina din CMC Vellore a ana solun, Dr. M C Matthew vetkolna noi-a phatah in ahin jenun, chuin chate ni chu lekha sim sah din, thumopna ahin nei ui. Aban in, World Vision of India noi a Feb. 17, 1998 chun natohna ahin mun, chateni lekha sim theina ding tin Guwahati a ahinsol tauve. Amri Area Developement Programme kiti project a Field Organiser in ana pangin, 2000 kum chun Programme Co-ordinator promotion amun, project term kichai 2013 gei in ana tonge.

ECA Mission Board ten, Guwahati Mission Field ahin hong un, World Vision a anatoh toh kop thei din Pu J. Mang Doungel leh aloinu jong kithopina them khat apeuvin, Missionary danin ahin koi un, chule midang jong atoh khompi ding ahin goi tauve. Hichu Brahmaputra Valley Mission Field tin aki hen, ama jong Founder khat in ahung pange. Amani nupa hi Pathen natoh ngaisang tah, gunchu tah a pan la ahi jeh un, sinthei tah leh pachat um tah ahi lhone.

*Ordination* : Pathen lenggam natohna kum 10 alhintoh lhon leh World Vision noi-a mission natong jing khat ahina jal chule Pathen deisah achan jalin, 2003 ECA Annual Assembly a chun, Pastor candidate kilhenna Pro-Pastor candidate din ana lheng doh tauve.

Kum khat sungin ProPastor hina in, Brahmaputra Valley Mission Field leh KWS Guwahati kiloi khomna ho-ah 'Pastoral Ministry' natoh ahin tong tan, Feb. 4, 2004 a Henglep muna ECA Annual Assembly kikhop a chun Pastor din ordain ahin bol tauve. World Vision a natong lai ahi na chungu, Guwahati khopi sunga mission natohna lam hatah in anupa lhonin aboipi lhonin, hijeh chun ECA Church, 8th. Mile, Khanapara leh ECA Mission Centre, Satgaon leh Guest House ho jong ahung umthei tan ahi. Pathen loupina chang hen !

*2017 kum bih poimo* : Pathen natoh kum 25 lhinna, kichenna kum 25 lhinna, Rev. J. Mang Doungel dia tahsa kum 50 lhinna, chule Ordination achan kal kum 13 lhinna, kum ahi.

*Insung Pathen vangboh* channa ho chu ahile, - Genthei hahsatna lah-a Pathen na gunchu tah a anupa lhona atoh jomna, chule 2014 a acha athumna Isaac Jangmuonlal Sept. 18, 2014 a anei lhon, Guwahati Satgaon muna immun leh in anei doh, achapa alenpen Victor Jamkhogin in tukum 2017 a B.A. achai, abana achanu Mercy Lamhoichong jong Matric ahi, kum ahi.

Tulai hin, 'MyCity Initiative' kiti Urban Programming Project Guwahati a atongin, slum area a chapang ho aboipi ahin, ama Community Developement Facilitator in apange. Pathenin mabana jong ahin manna din taopeh ute.

## Pathen iti houding

Pathenin Israelte henga Pa then houdan ding thu anapei. Kel ngoi, kelcha, bong ho a kilhaina abol diuvin thu apei. Gan kihing lha ding le thisan kithe khum ding thu ana pei. Kelngoi luchunga khut ngap a, kilhaina dingin thu anapei (Levi. 8: 22-30, 9:2-4). Hiche thupeh ho phatah a amanuva ahile Pathen kipah a phatthei aboh uva, agamu adamsah a, anampiu khang touva gal ajo jo jiu ahi. Thupeh anit lou tengule mang thah jiuva ahi.

Pakai Jesu ahung phat in, thupeh hohi amang tapon, houdan jatchom ahin pantan ahile amite dei mon ahung um pantai. Jesun, "Nu mei neitahsanin, nanghon Pa chu hiche molchung jong hilou Jerusalem jong hideh louva, (bong le kelngoi a jong hilouva), nahou theina dingu phat ahung lhunge ... Pa chu ahou tahbeh hon lhagao le thutah a ahou na diu phat ahung lhung tan, tun hi koma aume" anati (Jn.4:21). Hiche thua kon hin Israel houdan leh Christa houbung kibah louna ahung umtan, ajeh chu Pakai Jesu athi kon in, aman "Keiman vannoi kajou tai" (Jn. 16: 33) atin, chule thil ijakai aki chai tai (aki bulhit tai) atin akaikun alhagao alhatai (Jn. 19:10). Chuin hou-ina pondal achunga pat anoi gei in akeh lhai (Mat.27:51). Akichai tai, aki bulhit tai, kiti hi vethuh jep ute. Khatnaa, Pa thutep abon chan aki chaitai, akimolso tai, tina ahi. Ninaa Kelngoi khelin Jesu aki that

tai tina ahi. Athumnaa, gan thisan khelin Jesun athisan atoh tai, tina ahi. John 1:29 in, "Ven, Pathen kelngoi nou, vannoi chonset pomang pa khu" kiti chu adih tai. Chule hou-ina pondal akesuh chun, Jesu hi Israelte thempu ho Thempu ahi, Thempu Chung nung ahi, ti avetsah ahin, Jesu seijui te jong Pathen thempu ahivu ti avetsah in, chule Israel le Gentile akikhen tapoi, abon chauva Pathen henga tao theina kot akihong tai, tina jong ahitai. Pondal chu mohke ahipoi.

Hijeh chun tukalse vang Pathen iti hou ding ham, tia kidoh angai tapoi. Jesun asej ho chu ajui chan vangpha, ajui lou Damun ahi tai. Ipi kiloi khomnaa um hin lang, ipi missiona hijongle chun Jesu sei banga Pathen nakihou ngai ahi. Jesun Pakai, Pakai eiti chan van gama lut lou ding, ka-Pa lunglam bol jouse chu van gama lut ding ati chu geldoh ute (Mat.7:21). Lhagao le thutah a houho chu Pa lunglam bol ho ahivu (Jn.4:21).

Pharisee ho chu hougut, hou tuhchah loi ahivu. Sadducee ho chu thempu hou natong ho ahivu, chule Danthu Sun ho chu jong ahivu, athum uvin hou khohsah hou ngailu ho ahivu. Ahinla asung lamu Jesun amun, alhagao hinkhou chu ahom keu ahi amui. Mitcho ho, mipha lhem ho nahivu, anati (Mat. 23:15-36). Sunglam mu Jesu kichat-a, asej jui angai-e. Hichu Pa lunglam ahi.

(Rev. Seikholen)

## Lhepna kijosah louding

Esther 3:7-15, Acts 24: 1-23. ‘Lhepna’ kiti thucheng hin ‘Thujou’ kisei ahi aphonng doh thei in, hijeh a hi amin ‘Lhepna’ kiti ahi. Genesis a Eve lhepna din satanin ajou ana sei-e. Nopsahna ding le adeichat ho aseipeh a alhep ahi. Jouva lhepna hi akilhemin, adeichat pen khat amuna dia kilhemji ahi. Mi meidoi le thase hon hichu atahsan uva athilo jiu ahi. Thujou a kilhepna Esther 3:7-15 leh Acts 24:1-27 sunga thuhi kihilna thei tah ahi.

1. *Haman in Mordecai avetda* : jeh a jou ase. Haman in akilet sahna Mordecai in anit lou jeh-a tha dinga agot achang seh in thatle amo ding kichat jeh in, Israel te toh tha khom dia agon ahi. Mordecai chun Israel Pathen thupeh anit a, mihem chu Pathen khela houda ding adei-a, Haman anga dilsu lou anahi. Hijeh a chu, Haman in jou lungthim asem a, Mordecai thana dinga Xerxes lengpa sumguh dangka talent sang som afeh a, Israelte thana dinga Daan ana semsah ahi.

2. *Judahte lamkai hon* : jou thun Paul ahilseuve. Judate lamkai hon Pakai Jesu huhhingna thupha sei phong Paul chu thu jouva angoh uva, tha agot-u chule ahithe i lou phat-a gam vaipo koma moso tei-a tha tei din lungthim ana nei ui. Paul in Judah lamkai ho jousei anelkhup in, Israelte tahsan akinep nau Jesu

atahsana, chonsete dinga thia hing doh kit ahina dettah a adinpi thu ana sei-e. Paul in ama tahsan ahilchet naa, Judah lamkai hon, ‘Lampi’ atiu chu Felix lengpan ahetsa, athu jong ase i ngam lou ahin, hijeh chun kino tah a seichai sanga ola seidin akoi jotai.

3. *Xerxes lengpa le Felix* : thutan dan chu hiti ahi. Xerxes leh Felix jong nehguh neigel, thudih a thu tan ahi lhon poi. Mordecai le Paul thudih a athi ngam, atahsan nungchon lou gel ahi lhone.

Kitepna Lui leh Kitepna Thah a hin, satan in jouva mi alhep lhah-a atha lo, chule Pakai Jesu thudih adinpia, atha vang uva ahin doh kit banga atahsante Pathenin adinpi jing, thi jongleu hing doh kit diu ahina kicheh tah in akihe doh thei-e.

(Dr. T. Lunkim)

## China a kho khat

China gama Yangsi kiti kho khat aumin, mi 80 cheng lah-a mi 36 vang anem ui. Amaho lah-a asang pen foot thum le inchi 10 ahin chule anem pen chu foot nile inchi khat ahi. Anem ho cha hi anem thou ve. Amaho sei danin kum 60 masang chun, natlen khat ahung laangin, hiche nat chun apet a nat-in aphah miho chu khangjou talouvin alhaue, ti hi ahi. Adeh in akum 5 a kipat sagi sung ho chu nemden ahivu. Amaho akikhan lhith uva ajinei jouva achau jong nem thou ahi, atiuve. Govt. in amaho khoa polam mi alutsah poi.

## Nuitem in, damna ahi

\* Police khat in, gari ahatal behseh jeh in Pastor khat lampia amanin, dangka 500 leudin, Receipt asune. Chuphat in Pastor in, “Mi hebol ho anunnom ui, Pathenin amaho ahebol diu ahi” titoh gomin sum chu anapei. Chuphat in Police pa chun, “Chen lang chonse kit tahih in” atin sum chu akilah tai.

\* Kichenna muna nungah nu von akang ngena akivon jeh chun chapang khat in anu henga, “Idia nungah nu khu akang ngenna kivon ham?” atileh anun, “Amanu khu tunia kipah thanom ahi” tin ana donbut-e. Chuin chapang chun anu koma, “Ahi leh idia gollhangpa chu avom jenga kivona ham?” ati kit tan ahile anun adonbutna ding amah in, thip beh in ana ume.

\* Nupa khat nilhah khat akiha nah lhonin, pao lou helin aume. Ajing jing kal matah-a pasal pa chu kholche ding ahin, lekha beh khat-a, “Jing jingkal pung 5 leh neihin thouvin, lenna kalapna din” tin asunin khat nu lupnaa akoi tai.

Jingkala ahung khah leh pung 6 anahi tan, lenna alap tapoi. Alung hang behseh in, ajinu thip beh a boxing khat nehseh ding angaito lai tah in, alukhap koma lekha beh khat amanun ana sunin, hia chun, “Pung 5 ahitai kithouvin” tin ana kisune.

\* *Ojapun* : “Nikhat teng igamu hi nehguh chah guh beina hiding ahi, kiti hi ipi ‘tense’ ham” tin adongin

ahileh student khat in, “Ojapu, hichu ‘Future impossible tense’ ahi” ati.

\* Ojapun chapang ho henga, “Ipi ibolu leh school hi thengsela iumsah diu ham?” atin ahile chapang khat in, “Ojapu, keiho jouse school kaida leu veng hijeng” anati.

\* Khosung khat a pasal ni, kimuda mama jeng lhon, houbung in Jesu thusim Drama bol ding tia apang ding mi ngaito pan tau, hiche phat chun khatpa chun Jesu hina dinga kho houbung lamkai henga amin ana petai. Hichu ajah phat in, khatpa ma chun, Rome sepai hina din amin ana pelut tai.

Drama apan tauvin, Rome sepai hipa chun Jesu akimat a konin ahin jep jing tai. Jesu cross a akhai jou uvin jong thumvei ajep kit nalai in ahi. Cross a kikkaipa jong chun thoh lel mama ta, hijeh chun cross a konin ahung kithol lhan, Rome sepai pa chu alol ameh in, “Nangpa hin, Pilate te in-mai a pat-a neibol dan mong mong hi kadei lou ahi” tin ana sei-e.

\* Pastor khat in lekha helou numei khat akichenpin ahi. Nikhat bu ahon pet in, ajipan insunga taona amangin, amanun athim ngai in ahi. Ajipan, “Vana Pathen, neilungset monge, Mercy, Joy, Grace, ka-ina neipen, kakipah-e” atile ajinu in Boxing khat ahin nehseh jenge, chule hitin ase i in, “Nakali Pastor, jile cha nei nahi, nakihet lou ham, hinpui lut pou pou tang, asam bu chinga kakei thang ding ahi” anati.

## *Het-a phachom ho*

11

\* Tulai hin mi sum, lungthima bola lah peh ding go mi atamtai, Mobile mangchaa ipipi tampi hinsei ho tahsan hih un. Na ATM validity kichai ding ahitai, ki block ding ahitai, hijeh chun na bank No. ho hin thot in tihoa mi lhem atamin, a No. amu teng, na bank sum nakoi ho akilah jiu thu ho akijai.

\* South India a mission thah khat in, phalbi jan daplai in, a-scooter a kampon (blanket) apon, lampama ponsil lhasam ho aban banin asilpeh in ahi. Eiho lama Mission hon jong bol thei tah ahi.

\* **2018 kuma dia :**

- Palm Sunday ... March 25
- Good Friday ... March 30
- Mother's Day ... May 13
- Pentecost Sunday ... May 20
- Father's Day ... June 17

\* Tukum Assam a chaanglei hoa chaang phung nelih a pang, lungtol (Caterpillar) apungin, changphung tamtah athat tai. Alung jong hi lungmecho tobang ahi. Hiche lung hi ni 45 ahing jie. Api khat in atui 300 cheng atha jin, hijeh hin phailei a het man lou kah in adimlha jiuve. Ama ho thana dinghi phailei a vatot vah ahiloule lou manchah ngai inte.

\* Japan gama numei ho natoh in apon valun, jinei manlouvin aumgam tauve. Numei 60% velin, pasal khat tou toh kidei-a, phat suhmang sangin hiche phat sung chun na kitoh leng

kei din apha chom joi, atiuve. Numei abangin pasal toh atoukhoma akihoulim pet-a, luhlua ana imudoh ji ahina aseie, ajeh chu atoh ding tam behseh-a thachol jiu ahitai.

\* 2016-2017 survey dung jui in, Manipur a HIV/AIDS nat hi pasal numei kitimat jeh ahipene, atiuve. Injection heu kikop a kona nat la hi 15% bep ahin, anu apan acha apeh son hi 7% bou ahi. Chule numei pasal kitimat a kona kilason hi 78% ahi, atiuve. Tupet in Manipur a hiche nat vei kiman doh 24,457 ahin, adeh in district thum hichu, Ukhrul, Senapati, Chandel ah atam pene atiuve.

\* *Yoga* : Mitnat (Glaucoma) nei hon Padahasana tia kihe yoga, tichu keng noi-a khut koi pa khu abolleh aphapoi.

Tingnat nei hon Ardh Matsyendrasana kiti malama kun chule kipeile le khu abolleh aphapoi.

Khupnat nei hon Padmasan, Bajrasan, Surya Namaskar kitiho abolle aphapoi.

Ating nahon (injure spine) Shirshasan kiti luchanga din pa khu abolleh aphapoi.

Akithem chuh panbep hon athemsaho bolho abol ule akisukha nomui, atiuve. (*Telegraph, 29XI17*)

\* Vannoi leiset a dahdul thuh chi 10,000 val (varieties of tomatoes) aume ... Khoiju thihkhe neo khat semna din khoi khat in pahcha sang somni beh tui alah khom angai-e.

12

*Christian Meivah* - sim te taona akiman peh jinge. Sumto kuma Rs. 100/- ahin, asim nom hon hin peuvin, sum napeh lhaa kona kum nakisim peh ahi. M.O. hin thot hon Editor kipe ding lekha beh a namin le address suntei un. Editor pu Mobile No.94355-51080 ah hin hetsah un, Manipur le Naga land a sumto peh na thei ho :-

- 1) Mrs. Neijathem Haokip, Haokip Veng
- 2) Ms. Lhingjanem Haokip, KBC
- 3) Mr. Douzahan Guite, Dewlah Land
- 4) Mr. J. Manchong (Lunpu), KCC
- 5) Rev. Lhoukholal, Kangpokpi Missn
- 6) Mrs. Veikholam, Ideal school, ccpur.
- 7) Rev. Seikholen, Medziphema, Nagld.
- 8) Mr. Seikholun Singsit, Kohima.
- 9) Mr. Kapcha Singsit, Dimapur.

## *Het-a phachom ho*

\* South Africa a tangtel foot 22 sao aume ... Thoukang khat in haa 47 anei-e ... Ahpi khat in kum khat in atui 300 gei atha thei-e.

\* *India ah* : Numei governor masapen ... Mrs. Sarojini Naidu.

- Numei Prime Minister masapen ... Mrs. Indira Gandhi.

- Mount Everest kaljou numei amasapen ... Bachhendri Pal.

- Supreme Court a numei judge amasapen ... Mrs. Meena Sahib Fatima Biwi.

- Merchant Navy Officer numei amasapen ... Sonali Banerji.

\* 'Samsung' kiti thuchenghi Korea pao ahin, 'Ahsi Thum' tina ahi.

*Christian Meivah*  
January - February, 2018

PRINTED MATTER

To :

*Editor :*  
Rev. M. Haokhothong,  
C/o, Tingjanem Manchong  
Nichols Higher Secondary School, Satribari,  
P. O. Rehabari -781008, Guwahati, Assam.